



閩媛典第二百九十二卷

閩節部列傳一百七十四

皇清二十五

劉克昌妻馮氏

按蠡縣續志馮氏劉克昌妻明崇禎十一年昌死難無子女氏年二十七撫

姪劉炳爲嗣炳亡又撫姪瑀俱以紡績教讀苦節三十六年卒

郭宗孔妻張氏

按蠡縣續志張氏郭宗孔妻夫亡二子方襁褓無依勤紡績教子讀書

長文炳舉壬子孝廉中丙辰進士次亦成名

馬行可妻李氏

按蠡縣續志李氏馬行可妻明崇禎十一年夫亡子九歲氏年二十九甘貧

守節紡績教子讀書年六十有四卒

劉天寵妻李氏

按蠡縣續志李氏劉天寵妻天寵于崇禎五年病亡氏年二十五勤紡績教

子讀書入泮家以不墜康熙間學使旌其門

張五品妻何氏

按蠡縣續志何氏張五品妻夫亡氏年二十二孀居六十餘年課子耕讀以

古今圖書集成
一
送姑終學使旌表

張博妻楊氏 按蠡縣續志楊氏張博妻夫亡子僅百日氏年十八苦守孝姑教子姑疾躬親湯藥禱于天求以身代姑獲痊子得成立年七十一歲卒

倪道亨妻李氏 按雄縣志李氏倪道亨妻夫亡雙親在堂氏生養死葬俱出十指撫一子一女成立婚嫁悉自營辦康熙二年卒年七十有五有司旌其門

郭沆妻田氏 按雄縣志田氏武探花郭沆妻沆沒氏年二十九撫育二子成立艱苦備嘗身嬰痼疾卒年五十有七

張鏡妻袁氏

婦章氏附

按深澤縣志袁氏張鏡妻年十八生子五月夫亡誓不欲生既承翁姑諭

恐背二人不孝遂許撫孤焉及子成人早夭遺二孫氏與媳章氏相勉安命同撫幼孤孀居五十餘載艱苦備嘗年六十有八

袁斌妻段氏

按深澤縣志段氏袁斌妻閨靜寡言克勤中饋日勵其夫專心學業年二十二

夫亡矢志撫三子教之讀書勞苦以給膏火守節三十餘年

楊克新妻孫氏 按深澤縣志孤莊村孫氏縣民孫常緒女年十四嫁楊得保之子克新歸二載而新亾矢志守節茹藥飲冰歷二十三年常緒忽以逼死節婦情狀控令謂其女見逼於翁得保與小叔永新以致伏毒身死令惻然憫之爲鞠訊乃有克新之外祖徵仕郎劉公名志伸者偕同里諸生及耆老數人面陳孫氏節孝并致死之由率兩造求息訟其言曰氏少而靜默早嫁年未笄而寡守死無二二門和順翁姑視若親生其致死之由則爲失一結髮時珠鉤所致常緒以女無端忽死故控于官雖然一珠鉤之微何足致氏于死或曰以孤燈織紉生活惟艱念其得之難而傷心以死或曰是必翁姑妯娌間以氏亾一重貨交相譏責憤恚覓死令曰此庸婦之常不足以論節婦詩曰髣髴彼兩髦實維我儀之死矢靡他蓋物在如人存見髦如見共伯焉故詩序以共姜爲怨而慕也今氏之死于珠鉤猶共姜之志也

袁吉妻李氏 按深澤縣志李氏生員袁吉妻士人女讀書知大義年十六歸吉爲袁家婦眉案間度越恆匹爲婦三載年十九夫病沒李不食飲者累日其母泣而告曰死何爲李曰生何爲時舅姑方悲痛揮淚慰之祖姑諭尤切諸姑伯姊曉譬多方始改曰夫爲人子不及事其父

顧反累其父乎吾爲其妻代終其職可矣因盡孝以事翁姑左右就養晨昏定省不啻其夫之存至於祖姑春秋高耄不能用耳目自寢興以迄飲食與撫嬰孩無異他如叔姪妯娌賤及臧獲無疾言無怒色一以勤儉先之後氏叔父棄世從弟亦亾未幾從弟婦及姪並相繼死祀幾絕孀母年八旬與弱孫孫女孤處無依氏謀于姑歸與同處事老撫幼倍歷辛苦以終其身

尹維廉妻張氏

按東鹿縣志張氏尹維廉妻年二十二夫死于亂時氏在母家聞變遂投繯

衆救得甦自念曰孀姑年老且有身不得死也後生男姑年至八十餘卒氏殯葬如禮撫孤成立年六十二終

馮開文妻王氏

按東鹿縣志王氏馮開文妻年二十二夫死無出家貧姑老紡績供養苦節

六十四年

鄭皇玉妻高氏

按東鹿縣志高氏鄭皇玉妻年十九夫亡遺二女無子氏撫之適人守節四

十餘年冰霜自勵

石大禎妻辛氏

按東鹿縣志辛氏石大禎妻年二十三夫客死於遼東氏撫遺孤及長又死

山右家在水鄉赤貧苦節不移年八十卒

杜天起妻張氏

天昇妻附

按東鹿縣志張氏杜河莊人杜天起妻起年二十二歿無子起弟昇年

二十三亦天遺二子長冲斗次如柏昇妻亦張氏妯娌各撫一子起妻養冲斗繼起嗣昇妻留如柏承昇嗣矢志同心俱以壽終縣令兩旌其門

王本振妻李氏

按東鹿縣志李氏王本振妻年二十四夫死不再嫁子星燦甫五歲撫之及

娶子死遺未歲孫昌基值亂家破勤績紡以養之成人子昌基忽失明李又撫四曾孫孤苦五十餘年年七十二縣令旌其門

王某妻李氏

按東鹿縣志李氏王某妻年二十夫死於兵有遺腹後生男撫孤養姑家貧拮

据歷盡艱苦守節五十二年

劉尙德妻潘氏

按東鹿縣志潘氏劉尙德妻夫家貧性癩娶潘二年傭工歿於外氏無出並

無親族紡績以供姑食或貽以果餅必以奉姑餘則復進守節六十餘年

郭三秋妻馬氏

按東鹿縣志馬氏郭三秋妻年十七夫死子未晬舅姑老舅歿事姑三十餘

古今圖書集成
三
年守節至八十一歲卒

田之傑妻谷氏 按安州志谷氏田之傑妻城陷夫死氏年十七欲自盡因有身強飲食以冀存田氏一綫後果生子鞠育盡瘁織紡四十餘年有司旌表

劉灼妻谷氏 按安州志谷氏劉灼妻適灼三載灼亡氏籲天欲以身殉年方十八子未一歲家人環視解勸遂毀容自誓苦守三十餘年有司旌表

邵弘域妻李氏 按安州志李氏邵弘域妻夫亡晝夜哭泣執志苦守事姑撫幼紡績度日飢寒困苦四十餘年卒年七十有三

馬文進妻王氏 按安州志王氏馬文進妻適文進四年產子未齠而寡兄欲奪其志氏自經于樑索絕不得死遂堅持苦節奉翁姑育穉子曲盡其心康熙十一年督學旌其廬年八十

顧大成妻魏氏 按安州志魏氏顧大成妻年二十夫亡痛哭欲死翁姑勸曰汝雖無子今伯姒方妊倘生男可爲汝嗣移時姒果生男因與爲嗣兒出痘危甚氏焚香禱祝願以身代及長竭力教之讀書遂登春榜未幾天沒氏復煢煢獨守歷數十年惟日誦大士真言年七十餘卒

韓用義妻張氏 按高陽縣志張氏韓用義妻長史弦姪孫女也年十九夫亡子方歲毀容勤紡織養孀姑撫弱息備極艱苦教子爲諸生子天張又育兩幼孫家無儲粟苦守至六十餘年十指猶勤作不輟見者無不垂淚

韓用忠妻王氏 按高陽縣志王氏韓用忠妻夫亡年二十子方在抱遺產止茅屋二楹薄田數畝氏晝夜拮据撫孤成立守節三十年終

管學畏妻劉氏 按新安縣志劉氏管學畏妻夫亡年二十守節撫幼子成立歷艱苦五十年人稱慈母

鄭宏材妻趙氏 按易州志趙氏鄭宏材妻夫病亡矢志守節四十餘年壽七十四以疾終王經妻喬氏 按河間府志喬氏王經妻夫亡年十九子未週歲翁姑欲令他適氏以死自誓撫孤維鼎成立年六十一疾篤泣謂姑曰婦苦守四十餘年已無遺念第未能奉姑終餘齒爲恨耳言畢而絕

蘇允恭妻張氏 按河間府志張氏蘇允恭妻年二十八夫亡守節紡績奉姑教子成立年七

十卒

陳國恩妻李氏

按河間縣志李氏陳國恩妻年二十四夫亡堅心苦守撫遺孤成立歷四十

餘年如一日

許光裕妻胡氏

按河間縣志胡氏許光裕妻年二十九孀居歷遭兵燹家貧苦節紡績自甘

教三子皆成立

韓文光妻左氏

按河間縣志左氏韓文光妻明崇禎壬午遇變夫死氏年二十五卽墜井救

之復生病數月始愈秉志勵節歷艱苦不移撫幼子三人長作肅早登武科季明哲爲諸生皆

慈訓之力縣令旌表

梁孟冬妻李氏

郝氏吳氏附

按河間縣志李氏梁孟冬妻冬亡撫孤梁臣守節年八十四卒臣早

喪臣妻郝氏撫孤朝相守節年八十一卒朝相妻吳氏亦少寡撫孤禹甸守節終身三世一轍

鄉里重之

魏志高妻蔡氏

按河間縣志蔡氏魏志高妻高沒撫孤苦守紡績教子琰爲諸生年八十卒

張崇孝妻崔氏 按河間縣志崔氏張崇孝妻夫亡撫孤守節四十六年事舅姑躬紡績克盡婦道教子孫成立鄉里稱其賢淑

楊梯妻郝氏 按河間縣志郝氏楊梯妻夫亡守節終身事公姑曲盡孝道姑病醫藥祈禱無所不至積財好施完人骨肉周濟全活甚多有司旌表

田國翰妻李氏 按河間縣志李氏田國翰妻夫亡氏年二十二撫六歲子耀先矢志守節延師教耀先爲諸生縣令旌表

孟三聘妻牛氏 按河間縣志牛氏孟三聘妻夫亡年二十餘苦志守節事翁姑撫幼子歷兵荒離亂四十年如一日

連篚妻侯氏

婦王
氏附

按任丘縣志侯氏連篚妻早寡長子在抱遺腹生子氏苦守二雛艱苦奉

姑以送其老爲長子娶王氏長子亦死遺孫興王氏又訓之成立

王登鏜妻張氏 按任丘縣志張氏王登鏜妻早寡上有老親下遺幼子氏苦志守節孝事翁姑教其子成立

郭鵬程妻高氏

按任丘縣志高氏郭鵬程妻夫死年三十苦節教諸子俱成立

郭茂煒妻劉氏

按任丘縣志劉氏郭茂煒妻少寡無子家計消乏氏勤績紡以自給年七十

餘卒

杜始欣妻栗氏

按任丘縣志栗氏絳州守杜濬孫始欣妻興早死姑老無子氏奉之惟謹疾

痛疴癢死喪之急無不一身任之姑既葬或勸更事貴室氏曰我固公孫婦復以無所依賴勸之氏曰予初固有夫也而今若此命當無夫再嫁亦死勸者慙去

章雲程妻范氏

按任丘縣志范氏章雲程妻趙北口人隨夫移家天津夫亡一時並死五口

氏年二十六攜五棺歸葬既畢禮佛持齋撫孤姪幼子俱成立

張朝翰妻王氏

按任丘縣志王氏段村張朝翰妻朝死王年十九歲撫養遺孤苦守六十餘

年

鄭恩昌妻張氏

按任丘縣志張氏舉人鄭恩昌妻昌死張年二十二事孀姑秦氏婦道惟謹

及卒葬克成禮苦節終身

孟光明妻林氏 按交河縣志林氏孟光明妻年二十九生二子明亡遺二幼子氏哀慟欲死諸戚指其孤曰若死將焉寘此兒遂矢苦節甲申之變翁及伯氏俱殉國難氏以一身支門戶更爲狼狽康熙六年有司旌表

陳諫妻張氏 按交河縣志張氏陳諫妻年二十四夫亡家貧翁姑俱老三子皆幼氏執女紅事舅姑克盡孝道養生送死無憾子奉母教俱成立康熙元年公舉旌表

蘇麟妻王氏 按交河縣志王氏蘇麟妻年二十三夫亡守二子長四歲次二歲俱教之成立年五十餘邑令旌表

及蕃妻林氏 按交河縣志林氏及蕃妻年二十有五而寡守三歲孤兒辟纁自給子奉母教讀書有成康熙六年有司旌表

張養厚繼室崔氏

李氏附

按交河縣志崔氏張養厚繼室前室子諤與父相繼沒崔年二十二

諤妻李年二十三相依苦守辟纁自給崔年七十餘李年八十卒

李佐邦妻余氏

婦高氏附

按交河縣志余氏李佐邦妻佐邦死氏年十七苦守遺腹子士震方娶

生子而天婦高氏克繼姑志撫孤大經成立長齋自守奉姑以盡其年

李元蛟妻尹氏 按交河縣志尹氏李元蛟妻年三十夫亡撫二幼子桐梓比長令就外傳不

以姑息爲愛時篝燈監其夜讀二子如母教卒底于成氏以節終老

滑良妻馮氏 按交河縣志馮氏滑良妻夫亡遺孤嶽甫三歲家赤貧翁年七十八姑鄒氏年

六十五連歲凶荒糠覈不足氏以女工所易僅供二親後八年翁姑相繼沒氏獨營窻窰不資

外助康熙六年年五十餘有司旌表

張一全妻郭氏 按交河縣志郭氏張一全妻夫亡年二十四無子苦節以事翁姑翁年九十

七姑年八十七每對人曰吾二人迄今無恙者賴有賢婦也因名其里曰賢婦里

時澤妻高氏

婦張氏娣張氏附

按交河縣志高氏時澤妻年三十夫亡撫孤樸及娶又早世婦張氏

年二十二孤孫炤未半歲會高娣張氏亦寡三嫠嫠共守一雛至死靡他相依終老

張奇養妻郭氏 按交河縣志郭氏張奇養妻夫亡年二十九無子女獨紡織以自給持身甚

嚴至戚無敢以非語犯明末遇凶年族人張國節夫婦俱餓死遺子阿清僅四歲氏收養爲己

子共延殘喘後清長爲娶妻生二子續張祀

李蕊妻高氏 按交河縣志高氏李蕊妻年二十八夫亡幼子老親惟氏一身是賴夙興夜寐

不遺餘力苦節三十餘年有司旌表

褚鑛妻張氏 按交河縣志張氏褚鑛妻年二十三鑛亡守孤子亮誓死靡他家貧紡績自給

不數年家聲丕振康熙六年年六十餘有司旌表

郭燦妻時氏 按交河縣志時氏郭燦妻年二十三夫亡三日不食欲自盡姑抱孫哭氏感悟

強自節哀稍進飲食克勤女工寒暑無怠及子長令讀書成名康熙六年有司旌表

劉文錡妻趙氏 按交河縣志趙氏劉文錡妻年二十六夫亡遺孤璋甫五歲家貧教子克振

劉宗康熙六年旌表

董三樾妻谷氏 按青縣志谷氏董三樾妻年二十七夫亡無出勞勞靡依氏堅貞自矢苦節

五十餘年康熙十二年縣令旌表

張元調妻范氏

婦邢氏附

按靜海縣志范氏張元調妻夫亡年二十孝事孀姑頻歷險阻一子五

歲及長又沒遺孫三齡家業愈蹇氏立志彌堅率婦邢氏共守苦節教其孫登仕籍年八十餘歲卒

胡宣恭妻于氏 按靜海縣志于氏諸生胡宣恭妻夫早喪撫二孤子流離顛沛矢志靡他苦節四十年二子俱成立有司旌表

谷允元妻郭氏 按靜海縣志郭氏諸生谷允元妻年二十二夫亡堅守苦節治家勤儉訓三子讀書俱成名歷今五十餘年閭邑重之

董中惺妻王氏 按靜海縣志王氏生員董中惺妻年二十三夫亡子甫二歲矢志守節終其身儉朴自安

杜敬止妻李氏

妾馮氏附

按靜海縣志李氏生員杜敬止妻敬歿氏持家多經理才教子有法度

存心仁恕與側室馮氏同志守節愛養三十餘年無分彼我

李鳳翱妻張氏

按靜海縣志張氏庠生李鳳翱妻翱歿家極貧遺孤在抱氏紡績治生教子

成立年八十五以壽終

王慎妻齊氏 按靜海縣志齊氏王慎妻夫亡守節一子僅九歲家計貧乏艱苦備至年七十

七有孫八人

張允潢妻郭氏 按靜海縣志郭氏生員張允潢妻夫亡家貧子幼一無所倚艱苦畢嘗矢志

無二哺養二子成立克保其家

周光引妻劉氏 按靜海縣志劉氏邑庠生周光引妻引早亡氏哭泣不食幾殞家貧無儲宿之糧賴針黹以度日所生二女日教之紡績或以富室誘之不顧苦節終身

戈之靖妻馬氏 按景州志馬氏考授知縣戈之靖妻少歸靖能孝翁姑睦妯娌夫婦相敬如

賓靖五十無嗣氏爲納妾生一子一女靖亡子未週歲氏愛之逾己出持身治家內外肅然

高雲臺妻蘇氏

附女

按景州志蘇氏高雲臺妻夫亡年二十八止一女年十三貧高三樂爲壻

越三載壻沒遺孤開泰家貧無倚母女紡績教開泰成立苦守數十年

趙維緒妻蘇氏 按景州志蘇氏趙維緒妻緒歿於兵氏年二十九家貧子幼苦節終身

焦一舉妻高氏 按景州志高氏焦一舉妻年二十七夫亡子世榮方六歲紡績教子苦守四

十餘年

蘇繼宗繼妻景氏 按景州志景氏蘇繼宗繼妻年二十八宗亾前室子蘇旭年十歲景愛之逾己出紡績教訓苦守四十年年六十八卒

李守良妻孫氏 按景州志孫氏清和鄉李守良妻良亡氏年二十六二子俱幼翁老無依氏紡績以養備歷艱苦翁沒長子既娶復亡遺孤孫甫三月又撫之成立苦節四十餘年

李宗舜妻王氏 按景州志王氏李宗舜妻舜亾氏年二十八家貧翁老子幼氏紡績爲養值凶年人相食翁亾家累絕火惟飽糠覈不易其守舜弟宗周憐其志稍贖給之卒能教子成立年七十八終

倪毓德妻蘇氏 按景州志蘇氏儒士倪毓德妻性貞淑年十六歸德越三年德亾於兵氏年十九子女俱無翁姑議嫁之遂絕食欲死議息乃復食舅歿家貧奉姑愈謹苦節終身

張克紹妻蘇氏 按景州志蘇氏諸生張克紹妻有淑德歸紹生一子紹亾氏年二十家貧紡績度日苦守四十餘年